

Date – 11/11/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Bana Kaih (Handholding) Scheme hnuaiah November 4 thleng khan progress partner ni tumte dilna 6,010 a lut tawh.**
- 2. Mizoram sorkar chuan state human rights commission din turin chak takin hma a la mek.**
- 3. Jharkhand inthlan thawhkhatna campaign hun ni khat chiah a awm tawh avangin Political Party ten theihtawp an chhuah mek**
- 4. Jammu & Kashmir-ah sipai pakhat firfiakten an kaphlum a, mi dang pathumin hliam an tuar.**

<><><>

HAND-HOLDING

Sorkar flagship programme, Bana Kaih (Handholding) Scheme hnuaiah November 4 thleng khan progress partner (tanpuina dawngtu) ni turin dilna 6,010 a lut tawh a, November tawp lamah tanpuina (loan) hmu turte thlan tum a ni.

Bana Kaih (Handholding) hnuaiah dilnate chu an project kaihnawih sorkar department-te'n endika an thlitfim hnuah Handholding Scheme-a thuneitu sang ber (apex body) - Mizoram State Policy Coordination Committee (MSPCC)-in tanpuina dawng turte a thlang dawn a ni. MSPCC hotute sawi danin Bana Kaih hnuaiah November 4 thleng khan progress partner ni tura dilna 5,010 a lut tawh a, Dilna lut tawh zinga 5,961 chu mimal dilna a ni a, pawl anga dilna 49 a awm a, Dilna te chu an project kaihnawih department tina a khawihthu nodal departmental committee-in an endik mek thu an sawi.

MSPCC hotute chuan, department-te'n dilna zinga hmu flak nia an ngaihte chu MSPCC-ah tanpuina hmu turin an rawt dawn an ti a, Department-te chu tun thla (November) ni 15 ah an hmachhawp thelut phawt turin an ti tih sawiin an hmachhawp chu tun thla tawp lamah ngaihtuah an tum an ti a, progress partner tura thlante tan training buatsaih a nih dawn thu leh training zawah loan pek a nih dawn thu an sawi bawk.

Bana Kaih hnuaiah hian scheme kalpuitu implementing department 16 a awma; chung department 16-ah chuan eizawna tur trade 155 a awm a, November 4 thlenga dilna lut 6,010 zinga 2,312, za zela 38 point 47 chu Commerce & Industries department hnuaiah dilna a ni a; Commerce & Industries department-ah hian trade hrang hrang 43 a awma, implementing department 16 zinga trade tam berna a ni.

<><><>

AIZAWL AQI ON DIWALI

October ni 31 Diwali zana Aizawl boruak chu Air Quality Index atanga tehin 222 a kai.

Akashvani Aizawl zawhna chhangin Mizoram Pollution Control Board hotute chuan Aizawl bika boruak thianglim leh thianglim loh tehfung chi thum hmanga an teh-ah Dewali, October ni 31 zan a Aizawl boruak chu Air Quality index-a a lan dan-in 222-ah a kai a, hei hi boruak tha tehna, a a tha lam zawnga palina a a chhuk thlak avangin, rei tak hip luh a thawk lama harsatna thlen thei a nih thu an sawi.

Pi Lalhriatkimi, Scientific Assistant, National Air Monitoring Programme-in Akashvani Aizawl a hrilh danin, Mizoram boruakah nitrogen oxide leh sulphur oxide teh te tel thin a ni a, lirthei pung chho zelin nitrogen oxide chu a tih san chho telh telh thu a sawi. Kumin Hindu eng kut (Diwali) hi kum dang ngaihtuah chuan halpuah hal tlem ber pawl ni a hriat a ni.



LAND OWNERS

National Highway 502 'A', KMMTT kawngpui ti a hriatlar, Lawngtlai atanga Myanmar pawha kawngpui sial a ram neitute'n zangnadawmna an hmuhtheih loh, pethuai tura thuneitute an nawrna kal zelah, he lai kawng ping siam leh kawng hnawhtu thenfai tuma beihna chu na takin an dodal chhunzawm zel.

Lawngtlai District Land Owners Association hruaituten Lawngtlai a kan Corr Lalnggheta Ralte an hrilh danin, kawng sial na'na mimal ram tihchhiat, ram neitu diktak mi 138 te chu Anti Corruption Bureu in a finfiah hnu-ah High Court pawhin a nemnghet a, zangnadawmna pek theih an nih lai a tikhawtlai reng mai chu engti kawng maha hriatthiam theih a ni lo an ti a. Zangnadawmna an hmuh hma chuan helai kawng sial tlang hi an remti lova, sialtlang tuma hmalakna awm mek pawh na takin an dodal zel dawn niin an sawi a. Lawngtlai atanga Kilometre 11 vel a kawng chhuat tla a helna siam tuma hmalakna chu Inrinni khan ram neitute hian tlawhin, hnathawh chhunzawm a ni lo niin an sawi.

Hetihlai hian tunkar Zirtawpni khan helai kawng hi Lawngtlai bawrhsap Pu Cheemala Siva Gopal Reddy chuan tlawhin, he kawng hmang tangkaitu mipui dinhmun thlirin, kawngpui sialtlang thuai pawimawh a tih thu a sawi a, hemi chungchangah hian Lawngtlai District Land Owners' Association hruaitute chuan Lawngtlai DC chu kum sawm chuang harsatna an tawh hrethiam lo-ah puhin, zangndawmna an hmuh thuai theih na'n theihtawpa hmalaksak zawk turin an beisei thu an sawi.



SHRC

Mizoram sorkar chuan state human rights commission din turin chak takin hma a la mek.

Home department hotute hnen atanga thu dawn danin October thla khan state human rights commission dinna tur hriattirna hi Mizoram sorkar chuan a chhuah tawh a. Hemi atan hian hnathawk 16 lakna tur pawh sorkarin a pawmpui tawh bakah commission dinna tur atana thil tul dang bawh chak taka bawhzui mek a ni. Gauhati High Court chuan state human rights commission din tur hian Mizoram sorkar chu na taka nawrin September ni 6 khan thla 2 chhunga commission din ngei tur hian thu a pe a. A din lo a nih chuan na taka hrem a nih tur thu-in a vaukhan tawh a, a chhan chu commission dinna tur hi kum tam tak Mizoram sorkarin a tikhawtlai tawh vang a ni a. Chief Justice Vijay Bishnoi leh Justice Michael Zothankhuma te thutna division bench thuan sorkarin human rights commission din an tikhawtlai chu a lungawithlak loh thu na takin an sawi chhuak a. Hnathawk tur lak chungchang sorkarin a sawi pawh chu thu mai, a taka chantir la ni lo niin High Court chuan a ngaih tur a tarlang a ni.

Mizoram state human rights commission din chungchang hi kum 2021 khan public interest litigation (PIL) hmangin Zofa Welfare Organization (ZWO) president Rev. Robawia chuan a lo thehltut tawh a. PIL-ah hian Protection of Human Rights Act, 1993 tlawhchhana Mizorama state human rights commission din ngei a nih theih na'n ngenna an siam a ni. High Court chuan Supreme Court-in kum 2015 Dilip Kumar thubuai thehluh behchhana tihtura thupek dinglai awm chu Mizoram sorkar hian a la tipuitling lo a ni a ti. A hma hian Mizoram sorkar chuan state human rights commission dinna atan hian hna 29 siam tura sorkara dil chu kumin August ni 8 khan 16 siam phalsak a nih thu a sawi a. High Court chuan hei hi a tawh lo ni a sawiin Protection of Human Rights Act, 1993 tlawhchhan a thla 2 chhunga din a nih loh chuan court zah lohna thubuai chu Mizoram sorkar lakah ziaklutin hremna na tak pek a nih tur thu a hriattir a ni.



MUSIC FESTIVAL

Leitlangpui Music Festival, Lunglei khawpui a November ni 14 atanga tan turah inbuatsaihna chak taka kalpui mek zel a ni a, wawiin hian Tourism Minister Pi Lalrinpuin an inbuatsaihna chungchang thuthar thehdarhtute a hrilhfiah ang.

Mizoram sorkar chuan Leitlang Music Festival hi tun thla November ni 14 atanga ni 16 inkarah Kawmzawl Helipad leh a chhehvelah a buatsaih dawn a. He Festival atan hian cheng Nuai 25 vel ruahman ni-in Funding hi NEC atanga dawn tur a ni a. Inbuatsaihna kawng hrang hranga kalpui mek niin zai leh lam hmanga bakah hnam lam hmuh tur a awm dawn a, dawr hrang hrang 60 chuang zet siam a ni dawn a ni. He Music Festival hi Mizoram Sorkar chuan Serkawn zai kutpui lo awm tawh thin chawinun na'n leh khualzin mite hip na'n a a buatsaih a ni.

Lunglei leh a chhehvelah hian khualzinte tlawh theih turin hmun tam tak chei bawl a ni a, hmun hlui tam tak tuai thar niin mi tam tak hip khawm turin theihtawp chhuah mek zel a ni.



CM REVIEW

Chief Minister Pu Lalduhoma chuan Minister of State Prof. Lalnilawma enkawl department - Horticulture, Rural Development leh PHE department te hnathawh a thlirpui.

A hmasa berah Horticulture Department hmalakna enho a ni a. 'Bana kai' ruahmanna hnuai a thlai thar lei tur thlan chhuah pali zinga pathum hi Horticulture hnuai mi a nih anga an inbuatsaihna leh an hmalakna dang te chipchiar takin Chief Minister hma-ah an tarlang a. Horticulture department hian an hmalakna zawng zawng Bana Kaih ruahmanna hnuai luhpui (converge) vek a nih tur thu an tarlang. Kum khat kal ta chung khan an department hnuai loneitute'n Dragonfruit atangin cheng vaibelchhe 6 leh nuai 96, Balhla atangin cheng vaibelchhe 4 leh nuai 17, Lakhuihthei atangin cheng vaibelchhe 2 leh nuai 52, Tomato atangin cheng vaibelchhe 5 leh nuai 74, Dawnfawh atangin cheng vaibelchhe 3 leh nuai 49 leh Zikhlum atangin cheng vaibelchhe 6 leh nuai 57 vel an tharchhuak niin an sawi.

Rural Development Department hnathawh enho chhunzawm leh a ni a. Chumi hnu-ah PHE hnathawh enho a ni a. PHE department hian JJM hnuai huih tuilakna hna 852 an kalpui a. An zinga 657 hi tui chhuk luang hmanga lak a ni a, 188 hi ni-tha hmanga siam ni-in electric hmanga pump 7 a awm bawk. Heng zinga 832 hi zawhfel tawh niin hna kal mek 20 an la nei a. NABARD sum atangin Water Supply Scheme kal mek 11 an nei bawk. Hna thawh mek zingah Aizawl, Lunglei, Mamit leh khawpui danga tuilak hna an thawh mek te, Tawi tlang tuihna gravity hmanga thawh mek te, Swatch Bharat Grameen hmalakna te pawh chipchiar takin Chief Minister hmaah hian an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



JHARKHAND ELECTION

Jharkhand inthlan thawhkhatna campaign hun ni khat chiah a awm tawh avangin Political Party ten theihtawp an chhuah mek a. Prime Minister leh BJP hruaitu Narendra Modia chuan nimin khan Gurmia leh Bokaro ah te thu a sawi a. BJP-Kaihhrui ND A sawrkar chuan inpumkhatna chu a auhla ber a ni a ti a. He thupui avang hian Jharkhand leh India chuan nasa takin hma a sawn dawn a ni a ti.

Nizan vek khan Pu Modia hian Ranchi ah kawngzawh a huaihawt a. Hetihlai hian JMM hruaitu leh Chief Minister Hemant Soren chuan nimin khan Ranchi ah thu a sawi a. BJP bein central agency te chu dik lo taka hmangah a puh a. Hei bakah hian anmahni eptute aw hup betah BJP a puh bawk a ni.

Jharkhand assembly inthlan thawhkhatna hi naktip nilaini ah neih tur a ni a. Assembly bial 43 ah vote thlak a ni ang. Inthlan thawhhnihna hi tun thla ni 20 ah neih a ni thung ang.

<><><>

J&K

Jammu & Kashmir-ah sipai pakhat firfiakten an kaphlum a, mi dang pathumin hliam an tuar. Thudawn danin Kishtwar ngaw kara sipai leh firfiakte inkahnaah hian Para (SF)-a Nb Sub Rakesh Kumar chu kahhlum a ni a. Helai ngaw hmunah hian firfiak an awm thudawn bawhzuiin sipaite hian firfiak dapchhuah beihpui an thlak a ni.

<><><>